



Broj: 01,02, 03,03/11-05-1-124/14
Sarajevo, 14.7.2014.

Izveštaj sa 40. godišnjeg zasjedanja Parlamentarne skupštine Frankofonije Ottawa, Kanada, 4.-8. juli 2014.

U Ottawi je od 4. do 8. jula 2014. održano 40. godišnje zasjedanje Parlamentarne skupštine Frankofonije (u daljnjem tekstu: PSF) u čijem radu je, prvi put, učestvovala i Delegacija Parlamentarne skupštine BiH.

PSF je osnovan 1967. godine u Luksemburgu s ciljem zaštite i promoviranja francuskog jezika na parlamentarnom nivou da bi danas prerasla u savjetodavno tijelo koje okuplja parlamentarce koji govore francuki jezik i koje donosi vrlo važne političke, ekonomske, socijalne, kulturne i lingvističke odluke. PSF ima 79 država članica koje su podijeljene u tri grupe: stalne članice, pridružene članice i zemlje posmatrača u čiju grupu pripada i Bosna i Hercegovina. Skupština ima četiri komiteta: Politički komitet, Komitet za politička pitanja, Komitet za obrazovanje, komunikacije i pitanja iz kulture te Komitet za saradnju i razvoj. Na ovogodišnjem zasjedanju u Ottawi prisustvovalo je oko 350 delegata i 20 predsjednika parlamenata.

Parlamentarna skupština BiH primljena je u članstvo PSF na prošlogodišnjem zasjedanju u Abidžanu (Obala Slonovače), a ovogodišnjem zasjedanju, koje je ujedno i početak rada u PSF-u, prisustvovala je poslanica Azra Hadžiahmetović, članica Delegacije PSBiH u PSF-u.

Tokom ovogodišnjeg redovnog zasjedanja, a prije plenarnog dijela, održani su sastanci biroa, Mreže žena parlamentarki i komiteta.

Na sastanku Mreže žena parlamentarki usvojene su odluke sa sastanka Mreže održanog 20. januara 2014., a zatim su prezentirani i razmatrani prijedlozi izvještaja: Uloga političkih stranaka i uticaj izbornog sistema na predstavljanje žena u parlamentima, Žene i pokret saradnje u frankofonskom prostoru, Pristup žena novim medijima i Pristup djevojčica obrazovanju. Potom se raspravljalo o nadgledanju provođenja Konvencije o ukidanju svih oblika diskriminacije nad ženama (CEDEF). Predstavljen je prijedlog rezolucije koji se odnosi na učešće parlamentarki PSF-a u evaluaciji Komiteta CEDEF-a. Potom je predstavljen prijedlog rezolucije koji se odnosi na 20. Godišnjicu usvajanja Deklaracije i Akcionog plana iz Pekinga. Mreža žena parlamentarki primila je k znanju Mišljenje koje će PSF predstaviti na Samitu Međunarodne organizacije Frankofonije koji će biti održan u novembru u Dakaru.

Također, gđa Hadžiahmetović učestvovala je u radu Komiteta za saradnju i razvoj, na kojem je usvojen zapisnik i odluke sa sastanka u Lomeu (Togo). Zatim je razmatrana i usvojena

Deklaracija o klimatskim promjenama u kojoj se navodi da su klimatske promjene sve izraženije i da pogađaju sve više ljudi, te da je potrebno reagirati brzo i efikasno kako bi se te promjene zaustavile. Osim vlada, lokalnih vlasti, kompanija i civilnog društva, i parlamenti moraju preuzeti svoj dio odgovornosti u definiranju i provođenju zajedničkog odgovora na klimatske izazove, naročito donošenjem odgovarajućih institucionalnih, zakonodavnih i regulativnih mjera. Nakon toga su razmatrani i usvojeni izvještaji o zelenoj ekonomiji, biogorivima te zapošljavanju mladih u frankofonskom prostoru. Potom su članovi Komiteta za saradnju i razvoj raspravljali o međunarodnim trgovinskim pregovorima koji se vode u okviru Svjetske trgovinske organizacije, te o doprinosu Međunarodne organizacije Frankofonije (MOF), usvajanju nacionalnih strategija održivog razvoja i izradi nacionalnih politika upravljanja ekosistemima i prirodnim resursima. Na kraju sastanka, Komitet je usvojio saopćenje za plenarno zasjedanje PSF-a.

Plenarno zasjedanje su svojim govorima otvorili: Andrew Scheer, predsjednik Donjeg doma kanadskog parlamenta, Noel Kinsella, predsjednik kanadskog senata, Abdou Diouf, generalni sekretar Međunarodne organizacije Frankofonije, Andree Champagne, predsjednica Parlamentarne skupštine Frankofonije, te David Johnston, generalni guverner Kanade. Svi govornici naglasili su značaj koji danas u svijetu ima frankofonija i to u svim oblastima života, a posebno na povezivanju naroda i na njegovanju jezičkih različitosti. Također je istaknuta velika važnost koju u ostvarivanju ciljeva frankofonije imaju parlamentari, kako na globalnom nivou tako i u svojim nacionalnim parlamentima.

U PSF su primljene dvije nove delegacije Parlamentarna američka konfederacija i New Hampshire, promijenjen je status Armeniji, ukinuta je suspenzija tri delegacije (Gvineja, Madagaskar i Mali), te ukinut monitoring nad Obalom Slonovače.

Zatim je svoje obraćanje imao Abdou Diouf, generalni sekretar Međunarodne organizacije frankofonije, koji uskoro napušta ovu dužnost. On je govorio o radu Organizacije tokom svog mandata.

Potom su delegati ratificirali Memorandum o razumijevanju između Parlamentarne skupštine Frankofonije i Međunarodne organizacije Frankofonije.

Delegati na zasjedanju PSF-a zatim su iznosili svoje stavove o mišljenju koje će PSF uputiti šefovima država i vlada, u vezi s narednom temom Samita MOF-a koji će biti održan u Dakaru, a to je „Žene i mladi u Frankofoniji: pokretači mira, akteri razvoja“.

Svoja izlaganja zatim su imali: Pascal Terrasse, parlamentarni generalni sekretar PSF-a koji je predstavio izvještaj o aktivnostima PSF-a, Anne Brasseur, koja je govorila umjesto gosp. Michela Woltera, šefa finansija PSF-a, i koja je predstavila finansijski izvještaj PSF-a. Gđa Brasseur je potom imala obraćanje i u svojstvu predsjednice Parlamentarne skupštine Vijeća Evrope.

Potom se pristupilo prezentaciji i usvajanju izvještaja, rezolucija i preporuka sa sva četiri komiteta Skupštine (Politički komitet, Komitet za obrazovanje, komunikacije i pitanja iz kulture, Komitet za parlamentarna pitanja i Komitet za saradnju i razvoj), zatim Mreže žena

parlamentarki PSF-a, te o aktivnostima otpravnika poslova u regionalnim misijama. Proširen je mandat Mreže žena parlamentarki, a vezano za borbu protiv SIDA-e.

Delegati su diskutirali i o Prijedlogu strateškog okvira Parlamentarne skupštine Frankofonije za period 2013. – 2017. godine.

Na zahtjev kanadske delegacije u PSF-u, uručeno je počasno priznanje gđi Rose Marie Losier-Cool i gosp. Pierreu de Baneu, koji su imali velike zasluge u razvoju Parlamentarne skupštine Frankofonije.

Na kraju zasjedanja, gđa Andre Champagne, dosadašnja predsjednica PSF-a, koja zbog godina napušta kanadski parlament, predala je predsjedavanje PSF-om predsjedniku kanadske delegacije i sadašnjem novom predsjedniku PSF-a gosp. Paulu McIntyreu.

Saopćeno je da će naredno redovno godišnje zasjedanje Parlamentarne skupštine Frankofonije biti održano u Bernu (Švicarska) od 6. do 10. jula 2015., nakon čega je zatvoreno 40. redovno zasjedanje u Ottawi.